



後漢書補逸卷之十一

謝承後漢書第二

錢唐姚之駟

魯思

輯

董种

董种琅邪姑幕人爲不其令赤雀乳廳前桑上民爲作歌頌

案范書董作童种作恢注云謝書作僮种又作董仲今所傳本乃作董种未知孰是种又有咒虎一事與乳雀並傳當由信及豚魚非關仙術种字漢宗

馮緄

馮緄字鴻卿少學公羊春秋爲車騎將軍南征武陵

蠻賊軍至長沙賊聞悉詣營乞降進擊斬首四千餘級受降十餘萬人荊州平定賜錢一億固辭不受

案緄巴郡宕渠人學公羊春秋范作學春秋司馬兵法

緄南征表奏應奉賜金錯刀一具

案奉以緄薦為司隸及其成功又推美于奉較大樹將軍尤多讓善一節

緄子鸞舉孝廉除郎中

案范書稱緄弟允清白有孝行不載其子

周乘

周乘為交趾刺史舉奏二郡穢濁太守屬縣解印綬棄官者四十餘城

案范書闕

宗慶

宗慶遷長沙太守人多以乏衣食產乳不舉慶切讓三老禁民殺子比年之間民養子者三千餘人男女皆以宗為名

案此與賈父所生事絕相類而獨泯沒不章有幸不幸也范闕

彭修

彭修字子陽海賊丁義欲向郡郡內驚惶不能捍禦太守聞修義勇請守吳令身與義相見宣國威德賊遂解去民歌之曰時歲倉卒盜賊從橫大戟強弩不

可當賴遇賢令彭子陽

案修會稽毗陵人時仕郡為功曹海賊所向即修之本郡也范書稱賊張子林作亂郡請修守吳修與太守俱出討賊飛矢兩集修障扞太守而為流矢所中死太守得全賊素聞其恩信即殺弩中修者餘悉皆降言曰自為彭君故降不為太守服也與此不同

劉駒駘

劉駒駘除樅陽長以病免吏民思而歌之曰悒然不

樂思我劉君何時復來安此下民

案駒駘于永初中為校書郎與謁者劉珍等著作東觀撰集漢記因定漢家禮儀是以循吏而兼文苑未易才也

張綱

漢安元年選遣八使巡行張綱獨埋輪都亭奏大將

軍梁冀無君之心十五事皆臣子所切齒者

案綱字文紀犍為武陽人留侯裔孫時八使中惟綱年少官微而埋輪獨奏京師震竦冀雖固寵亦為寒心真千古一舉也後巡使多所糾彈而冀及諸宦官互為救請多被寢遏賴種暲復劾其罪惡國法乃伸蓋狐狸者豺狼之爪牙自古無有權奸在位而能澄清吏治者矣

劉虞

虞父舒丹陽太守

案虞字伯安東海鄉人范載虞祖嘉為光祿勳而佚其父名

虞通五經東海王恭之後

案范稱虞守道慕名為季漢之名宗子信然

蔣崇

蔣崇為北海相督郵闕更選功曹吏徐蒙曰無可為者惟功曹耳崇遂署蒙遣行縣謂曰相以督郵為耳目也

案范書闕蒙自薦之公過于內舉不避親者相即從而任之可謂知人

祝良

良字邵平長沙人聰明博學有才幹以廉平見稱

良為洛陽令常侍樊豐妻殺侍婢置井中良收其妻殺之

案良令洛陽時太尉龐參夫人殺前妻子良率吏卒入府案實其事有司以良擅折辱宰相繫獄吏

民守闕請代其罪者日數千萬詔乃原刑具見參傳則良真不畏強禦者然亦見東京守令能行已志如此又陳龜疏云前涼州刺史祝良初到州太守令長取黜將半政未踰時功效卓然則良原刑後又拜刺史漢世用人若此所以多賢長吏也

王奐

王奐字子昌河內武德人明五經負笈追業常賃灌園耻交勢利為考城令遷漢陽太守徵拜議郎卒

案奐亦獨行之士也故與范丹友善別見丹傳

高弘

高弘字伯武河內山陽人也為琅邪相自負笈卑步入界聽探風俗厚薄

案范書闕

弘到官悉出舍中供設付外冬坐羊皮夏坐板榻以桑杯盛漿水妻子不歷官舍

案謝書載廉吏多而且詳范俱遺之未免輕介節而重祿位矣

張陵

張陵字處仲為尚書初為梁冀弟後所舉孝廉正月歲初百官朝賀冀恃勢不恤王憲帶劍入省陵比冀入勅羽林虎賁奪冀劍即治劾奏罪亂謂陵曰舉君適以自罰也

案陵此舉令漢季臣子猶知有君奸臣膽落于張尚書矣范書作梁不疑為河南尹舉陵孝廉而謝

書謂後舉之循亦尹河南但冀子非弟也且不疑好經書善待士故陵為所舉彼胡狗之門處重肯受其薦耶此則謝之譌也陵為楷子范附祖霸傳

盛吉

盛吉為廷尉每至冬節罪囚當斷妻夜執燭吉持丹筆夫妻相對垂泣決罪

案吉仁心若此天下豈有冤民范書闕會稽典錄云吉字君達

吉自掌憲平法常懇惻乖念之

皇甫規

皇甫規字威明以先零陸梁上疏自陳乃以規為中郎將討降之會軍士大疫規親入菴廬巡視將士三

軍感悅

案規安定朝那人征羌屢著奇勳卒以忤宦官獲罪居家教授所著述皆傳世洵文為儒宗武為將表者耶後黨事起乃耻以西州豪傑不預自訟于朝其真子與氏所稱豪傑之士與非霍去病趙充國之儔也

王暢

王暢拜南陽太守下車振厲威風

案暢字叔茂王龔之子范附龔傳為守時豪黨有譽穢者使吏發屋伐樹堙井奪寵亦近酷矣

暢計日受俸不啻魚肉

案時郡中奢豪相尚暢故布衣皮褥車馬羸敗以矯其弊南陽帝鄉治之不易必也狂狷乎劉景升諫之淺矣暢子謙諫于案即仲宣也

朱寵

朱寵字仲藏為太尉家貧食脫粟飯臥布被朝廷賜錦被梁肉皆不敢當之

案范書寵事附見鄧騭傳中寵初辟騭府稱遷穎川守治理有聲又桓郁傳載郁門人楊震朱寵皆至三公則寵之經明行修有自來矣寵字范作仲威京兆人

許永

許永字永先為司隸校尉是時奄侍在內貴幸用勢永舉法無所迴避京師號曰許游光

案范書闕

于時中官子弟為令長官者並棄官去威烈風行于

是深見怨于宰臣遂見誣譖當下廷尉未謂友人曰
末年七十庶幾以忠義致身未得殲姦人之首而先
賊受害何能復入奏對刀筆吏乎遂仰藥而死

案未乘法無避權倖寒心二死亦足報國不得以明哲譏之也

賈彪

賈彪舉孝廉補新息長小民困貧多不養子彪嚴為
其制與殺人同罪養子者于數僉曰賈父所生男名
賈子女各賈女以此豐丁口也

案彪字偉節潁川定陵人即所稱賈氏三虎偉節最怒者也

蘇章

蘇章字士成北海人負笈追師不遠萬里

案范書闕

宗度

豫章宗度拜零陵令縣民杜伯夸清高不仕度就與
高談伯夸感德詣縣縣署功曹

案范書闕杜伯夸附見子根傳中名安少有志節號奇童位至巴郡太守甚得聲譽

郭諒

郭諒字恒直朗陰人師事杜喬李固之誅詣闕上書
乞收斂不聽因往守視其喪扇護蠅蟲

案范書作李固弟子汝南郭亮諒同亮古字通耳諒上書時年始成童義之所在死不為懼彼胡廣

趙戒輩備位三公乃畏慚不爭反受冀賞此五尺
童子所羞稱者楚國先賢傳又載南陽董班聞固
死奔赴守喪天子為之感動豈其時忠義之
氣在野不在朝乎抑冀威憐之銷鍊已甚也

楊章

楊章為杜喬所辟為平原令棄官還聞固喬曝尸星
行赴洛着弊衣赤幘守其屍驅護蠅蟲天子嘉其忠
義聽殯斂之

案范書作楊匡陳留人袁喜亦同范杜喬傳稱喬
故操楊匡聞喬慘死是行到洛托為夏門亭吏守
衛尸喪又帶鐵鎖上書并乞李杜二公骸
骨太后許之因送喬喪還葬行服烈士哉

徐栩

吳郡徐栩為小黃令時陳留遭蝗過小黃飛逝不集

刺史行部責栩不治栩棄官蝗應聲而至刺史謝令
還寺舍蝗即皆去

案范書闕蝗不入境循吏美談此更隨令
來去若巧相避然甚哉德政之感召深也

宣仲

宣仲為臨涇長吏民拔留改為宜民

案劉昭注郡國志云此見謝書李固傳而
范志無此固傳亦不載則范書之疎畧也

李固

固改易姓名杖策驅驢負笈追師三輔學五經積十
餘年博覽古今明于風角星算河圖讖緯仰察俯占
窮神知變每到太學密入公府定省父母不令同業

諸生知是邵子

案固字子堅漢中南鄭人司徒邵之子固忠烈彪炳史冊彰彰而密入定省不令同業知姓名一事尤為高崎范書獨乃遺此何也

固五察孝廉益州再舉茂才不應王府連辟皆辭以疾

案范書畧

固所授弟子潁川杜訪汝南鄭遂河南趙承等七十

二人相與哀嘆以為眼不復瞻固形容耳不復聞固

嘉訓乃其論集德行一篇

案時梁冀凶虐人避其燄杜訪輩乃能表彰固行哀集成書可謂不負其師矣范書但有趙承名

固臨終敕子孫素棺三寸幅巾殯斂于本郡堯堯之地不得還墓坐汚先公兆域

案固為梁冀所誅年僅五十四范但載固與胡廣趙戒書不錄此勅又案固對策引進銳退速二語為老子篇續漢書亦然章懷注云謝書作孟子

趙戒

戒字志信蜀郡成都人也博學明經講授舉孝廉累遷荊州刺史梁商弟讓為南陽太守恃椒房之寵不奉法戒到州劾奏之遷河間相以冀部難理整厲威嚴遷戒南陽太守糾豪傑恤吏人奏免中官貴戚子弟為令長貪濁者徵拜為尚書令出為河南尹轉拜

太常永和六年特拜司空

案范書戒附見李固傳固議立清河王引胡廣及戒寓書勸冀冀不從戒等遂攝威遷易守正不堅惜哉子典以共誅宦官下獄其蓋愆矣

趙典

趙典太尉戒之叔子也學孔子七經河圖洛書內外
菟術靡不綜貫受業者百有餘人天子宗典道懿尊
為國師位特進七為列卿寢布被食用瓦器靈帝即
位典與竇武王暢陳蕃等謀共誅中常侍曹節侯覽
趙忠等皆下獄自殺

案典字仲經范稱典遷長樂少府衛尉公卿表典博學篤聞宜備國師會病卒使者弔祠乃與此大

與袁紀載陳竇事亦無趙典名敘王暢事蹟頗繁而誅常侍事亦不列暢此云下獄自殺恐有舛謬

媯皓

吳郡媯皓父為南郡坐事繫獄皓懷小石至公卿門
輒出石叩頭流血覆面父遂得免

案竇武傳稱尚書令陳蕃胡廣等皆國之貞士朝之良佐尚書郎張陵媯皓等文質彬彬明達國典則皓之賢可知矣懷石救父至誠而動也范闕

尹苞

陳留尹苞與同郡范史雲善二人俱貧出入共一軍
衣到人門外苞年長常先着衣入須臾出解與史雲

案范書稱史雲所親善者李固王
與也尹苞事無傳此范之遺畧者

朱穆

朱穆為尚書歲初百官朝賀有虎賁當皆置弓于地
謂羣僚曰此天子弓誰敢干越百僚皆避之穆呵之
曰天子之弓當戴之于首上何敢置地大不敬即收
虎賁付獄治罪眾皆肅然服之

案穆字公叔南陽宛人亦稱文忠先生祖暉范書
有傳穆附焉避弓事續書作桓帝臨雍與此不同
夫小人假密神器侮弄大臣往往有
之公叔臨事不惑可為士大夫吐氣

穆為尚書讜言正直

穆因進見諫曰臣聞漢家舊典置侍中中常侍各一
人省尚書事黃門侍郎一人傳發書奏皆用姓族自

和熹太后以女主稱制不接公卿乃以閹人為常侍
小黃門通命兩宮自此以來權傾人主窮困天下宜
皆罷遣博選耆儒宿德與參政事

案常侍持權始于和熹後世乃承女主故事遂至
肆橫故雖女中堯舜亦不宜稱制也使早從穆言
豈至亡國于
奄豎之手哉

穆少有英才學明五經性矜嚴疾惡不交非類年二
十為郡督郵迎新太守見穆曰君年少為督郵因族
勢為有令德穆荅曰郡中瞻望明府如仲尼非顏回
不敢以迎孔子更問風俗人物太守甚奇之曰僕非
仲尼督郵可謂顏回也遂歷職股肱舉孝廉

案穆以顏子自擬未免過當然觀其為人立節忠清度恭機密亦賢者也蔡邕謂其貞而孤有羔羊之節良然穆文詞更擅絕古今邕乃至其家自寫之特絕交一論不無褊狹耳范不載

穆為冀州刺史有宦者趙忠喪父僭為璠與玉匣穆下郡案驗遂發墓剖棺陳尸出之而收其家屬帝聞大怒徵詣廷尉穆臨當就道冀州從事欲為畫像置廳事上穆留板書曰勿畫吾形以為重負忠義之未顯何形像之足紀也

案此足見公叔之貞而孤也楊龜山機其從梁冀之辟不得為貞孤亦責備賢者意耳畫像事范闕

劉寵

劉寵為司徒臥麤布波

案寵字祖榮東萊牟平人即為會稽守選一大錢受之者也位至三公清操不易乃知布被非詐

唐約

唐約字仲謙拜尚書閑習舊典質素密靜自典機樞數有直言美策每作表疏皆手自書之不宜于外處官不言貨利之事當法不阿所私京師謠曰治身無

嫌唐仲謙

案無嫌嫌字非徒以韻與謙押也禮所以別嫌疑嫌疑之際聖人所謹故公而嫌于私國而嫌于家人欲一毫未淨皆嫌也安得無嫌如仲謙哉范闕

荀緄

荀緄字伯條拜尚書性明亮敏于眾職以最羣僚秉

後漢書補卷 卷十一
機平直公卿大夫莫不憚之

案范荀淑傳淑仲子名緄八龍之一當卽此也又淑兄子昱亦字伯條何命字竟相同與又緄爲濟南相畏憚宦官爲子或娶唐衛女行事若此公卿大夫安得憚之豈別有一荀緄耶

曹破石

曹節弟破石爲越騎校尉越騎營五伯妻有美色破石從求之五伯不敢違妻執意不肯行遂自殺其縱

暴無道多類此

案范書見宦者曹節傳中節與王甫輩誅武蕃幽殺太后權勢炎灼殆在左回天唐獨坐之上腐身薰子之禍至此極乎破石之奪人妻其罪之小小者爾

龔遂

龔遂字巨卿拜尙書郎性敏達彌縫舊章深識典故每入奏事朝廷所問應時建白桓帝嘉其才臺閣有疑事一以委遂處當平決口筆俱着轉左丞

案口筆俱着四字簡而潔使拙手爲之數語不了也范闕

胡騰

胡騰辟荊州部南陽從事遇桓帝南巡又爲護駕到南陽騰自表上言乘輿所幸便爲京師臣請荊州刺史比于司隸臣職比于都官從事也

案騰字子升桂陽人騰之此表以扈蹕勳戚徵求無厭故自請比職都官得以禁戢暴橫引史者刪其前後遂覺無關係矣騰爲竇武府掾武誅獨殞斂行喪坐是禁錮義士哉

騰爲從事萬事既辦一州肅然百寮敬服其能

應奉

應奉字世叔少聰明自爲兒童及長凡所經履莫不
暗記讀書五行俱下終成名儒

案奉汝南南頓人自曾祖父順爲將作大匠後七
世通顯奉文武並展卓然人傑子劭卽著漢官儀
風俗通者應氏故世
以文章顯也范同

奉爲上計吏許訓爲計掾俱到京師訓自發鄉里在
路晝頓暮宿所見長吏賓客亭長吏卒奴僕目所更
見皆密疏姓名欲試奉還郡出疏示奉奉省讀之云
前食潁川綸氏都亭亭長胡奴名祿以飲漿來何不

在疏坐中皆驚

案今人行程每作日記若得與世叔同遊便
是行日記矣何必手錄晝頓暮宿四字亦鍊

奉年二十時嘗詣彭城相袁賀賀時出行閉門造車
匠于內開扇出半面視奉奉卽委去後數十年于路
見車匠識而呼之

案二事范書俱不載奉之天資
絕人如此宜其文武爲憲也

奉拜武陵太守坐公事免後武陵蠻復寇亂荆州車
騎將軍馮緄請與俱征拜從事中郎時詔奉曰蠻夷
叛逆作難積惡放恣鑊中之魚火熾湯盡當悉焦爛
以刷國耻朝廷以奉昔守南土威名播越故復式序

後漢書補遺 卷十一
重任奉之廢興期在于今賜奉錢十萬駿犀方具劍
金錯把刀劔革帶各一奉其勉之

案奉之功馮緄實成之見前緄傳

陳蕃

陳蕃爲樂安太守郡人周璆高潔之士前後郡守招
命莫肯至惟蕃能致焉字而不名特爲置一榻去則
懸之

案蕃見東觀記此所載與范同懸榻事人不知有周璆則以孺子高名掩之耳

蕃爲豫章太守雅正矯俗以禮導下

蕃諫桓帝曰當今之世有三空田野空朝廷空倉庫

空是謂三空加之兵戎未戢四方離散是陛下焦心
毀顏坐而待旦之時也豈宜揚旗耀武騁心與馬之
觀乎

案時桓帝有幸廣成校獵之舉故蕃疏諫之

周樹

周樹達于法善能解煩釋疑八辟從事
樹爲從事刺史孟觀有罪俾樹作章陳事序要得無
罪也

案范書闕老吏刀筆能于一二字間出入人罪當奉樹爲鼻祖

胡廣

廣有雅才學究五經古今術藝皆畢覽之年二十七
舉孝廉

案廣字伯始
南郡華容人

廣在台輔三十餘年經事六帝禮任甚優每遜位辭
疾及退逸田里未嘗滿歲輒復升進凡一履司徒三
登太尉及爲太傅其辟命皆天下名士與故吏陳蕃
李咸並爲三司蕃等每朝會輒稱疾避廣時人榮之
案廣生榮死哀爲漢典以來人臣第一但始同李
杜議立清河繼暉于梁遂爾遷易阿順卒以受封
析爵所稱天下中庸者
得無以鄉原爲中行乎
靈帝思感舊德乃圖廣及太尉黃瓊于省內詔議郎

蔡邕作頌文曰巖巖山岳配天作輔降神有周生申
及甫允茲漢室誕育二后曰胡曰黃方軌齊武維道
之淵維德之藪股肱元首代作心膂天之蒸人有則
有類我胡我黃鍾厥純懿巍巍特進仍踐其位赫赫
王事七佩其綬奕奕四牡沃若六轡袞職龍章其文
有蔚參曜乾台窮寵極貴功加八荒群生以遂超哉
邈乎莫與爲二

案邕有言吾爲碑銘多矣惟郭有道無愧耳此
頌雖奉制而作然胡公當之得不愧乎范闕

韋著

韋氏爲三輔冠族著少修節操持京氏易韓詩博通

術藝

案著京兆人韋豹之子范附見韋彪傳中少以經行知名屢徵不就後乃為中常侍逼迫不得已拜東海相竟坐論輸左校隱者耻之北山有靈能無通客之謝

李曇

曇少喪父躬事繼母酷烈曇性純孝定省恪勤妻子供奉寒苦執勞不以為怨得四時珍玩先以進母與徐孺子等海內列名五處士焉

案曇字雲口潁川人范附見徐穉傳中陳蕃胡廣薦章稱其德行純備蓋非徒以隱為高者

姜肱

肱祖父為豫章太守父為任城相性篤孝事繼母恪

勤母既年少又嚴厲肱感凱風之孝兄弟同被而寢不入房室以慰母心也常與季江俱乘車行適野廬為賊所劫取其衣物欲殺其兄弟肱謂盜曰弟年幼父母所憐愍又未聘娶願自殺身濟弟季江言兄年德在前家之珍寶國之英傑乞自受戮以代兄命盜戢刃曰二君所謂賢人吾等不長妄相侵犯棄物而去肱車中尚有數千錢盜不見也使從者追以與之亦復不受肱以物經歷盜手因以付亭吏而去

案肱字伯淮彭城廣戚人肱有二弟仲海季江季其少也世但知姜被為雁行佳話而不知天天棘心又有慰母一片苦心微謝書孰表之

靈帝手筆下詔曰肱抗凌雲之志養浩然之氣以朕德薄未肯降志昔許由不屈王道為化奪齊不撓周德不虧州郡以禮優順勿失其意

案如詔語非聖主不能乃靈帝手筆得之要見當持風氣下以石隱為高上以求賢為美

楊高

楊高字聖建拜尚書淵懿博雅治術亦辦優納王事明習國家典故幹機密之職夙夜周慎退食自公儀表偉麗每朝賀百寮側目

案范書闕

羊陟

羊陟遷河南尹計日受俸嘗食乾飯茹菜禁斷豪石書疏不與交通斷理冤徒進用善士節操者旌表異行

案陟字嗣祖太山梁父人奏黜宦姻升進清亮後黨事起僅免官禁錮其有明哲之知者耶

郭泰

泰遭母憂毆血發病歷年乃瘳

案泰字林宗太原界休人家世貧賤篤生崎士東漢人品卓然第一泰范書作太此蔚宗私諱今宜正改

泰之所名人品乃定先言後驗眾皆服之故適陳留則友符偉明遊太學則師仇季智之陳國則親魏德

公入汝南則交黃叔度初泰始至南州過袁奉高不
宿而去從叔度累日不去或以問泰泰曰奉高之器
譬之汎濫雖清而易挹叔度之器汪汪若干頃之波
澄之不清撓之不濁不可量也已而果然泰以是名
聞天下

案范書載泰所蓋土左原茅
容輩十許人此皆范所遺也

泰所識太原郭長信王長文長文弟子師韓文布季
子政曹子元定襄周康子西河王季然雲中丘季智
名靈舉子師位至司徒季然北地太守其餘多典州
郡者

案此皆泰同郡人
也范不列其官位

泰以建寧二年正月卒自弘農函谷關以西河內湯
陰以北二千里負笈荷擔彌路柴車葦裝塞塗蓋有
萬數來赴

案范書但言千餘人
會葬而已不詳載

劉儒

郭林宗歎儒有珪璋之質終必爲令德之士

案儒字叔林東郡陽平人林宗
稱其爲口訥心辯真儒者也

李咸

咸字元卓汝南西平人孤特自立家貧母老常躬耕

後漢書補遺 卷十一
稼以奉養學魯詩春秋公羊傳三禮三府並辟司徒
胡廣舉茂才除高密令政多奇異青州表其狀建寧
三年自大鴻臚拜太尉自在相位約身率下常食脫
粟飯醬菜而已不與州郡交通刺史二千石牋記非
公事不發省以老乞骸骨見許悉還所賜物乘敝十
車使子男御晨發京師百僚追送盈塗不能得見家
舊貧狹庇蔭草廬

案范書咸無傳僅見胡廣傳中云廣所辟命皆天下名士與故吏陳蕃李咸並為三司夫以咸后台輔而清節若此范書遺之何也

度尚

尚進善愛人坐以待旦握門下書佐朱儁恒歎述之
以為有不凡之操儁後官至車騎將軍遠近奇尚有
知人之鑒

案尚字博平山陽湖陸人特善于用兵數平寇盜乃始由宦者進繼嫁禍張磐欲諉已過其列小有才者耳續漢書云尚事母至孝通京氏易古文尚書為吏清操畧與范不同使尚果以孝子通經術豈肯呈身中貴誣謗同列耶

劉瑜

劉瑜父祥為清河太守

案瑜字季節廣陵人范載其父名辨與此異瑜上書陳事切中時機詔問災咎悉心直對亦剛直之士也

孔恂

孔恂字巨卿新淦人爲州別駕從事車前舊有屏星如刺史車曲騶儀式是時刺史行部發去日晏刺史怒欲去別駕車屏星恂諫曰明使君傳車自發晚而欲撤去屏星毀國舊儀此不可行別駕可去屏星不可省卽投傳去刺史追辭謝請不肯還于是遂不去屏星

案諫旣行矣何必投傳漢人尙氣節如此屏星車當也見說文范闕

楊喬

楊喬字聖達烏枕人也前後數上書陳故事

案范書喬事附見弟璇傳中

喬爲尙書侍郎轉左丞自在臺閣閑練漢家故事前後上表陳國政便宜

喬爲尙書容儀偉麗數上書言政事桓帝愛其才貌詔妻以公主喬固讓不聽遂閉口不食七日而死

案喬辭婚事義又出宋弘之上然益見世祖不强宋公之聖德矣又孟嘗傳載喬薦嘗疏云臣前後七表而身輕言微終不蒙察喬之薦賢其誠如此別本作楊高字至達高近喬聖近至傳寫訛耳

竇武

竇武上表曰今冬大寒過節毒害鳥獸爰及池魚城傍松竹皆爲傷絕

後漢書卷之十一
案武字游平扶風平陵人范書載武封事不見此語或其所刪也又案襄楷傳楷延禧中因災異上疏有云前七年冬大寒殺鳥獸害魚鱉城傍竹栢之葉有傷枯者又續漢書延熹元年洛陽城傍竹栢葉有傷者二書正指此

朱震

朱震字伯厚性剛烈初為從事奏濟陰太守單匡臧罪并連匡兄中常侍車騎將軍超三府諺曰車如雞棲馬如狗疾惡如風朱伯厚

案震陳留人范附見陳蕃傳中震為仲舉之友仲舉被難震棄官哭之匿其遺孤事覺誓死不言亦烈矣哉

震仕為郡主簿時戶曹史袁叔樾以微過太守郭琮

怒閉閤罰之眾皆悚懼震排闥直入乃前諫曰袁史則故御史珍之孫何為苛罰脫有奄忽如何遂釋之

案范不載

震又為郡從事曰震宿有負薪之憂力疾就車職重人輕必不堪久時濟陰太守單匡在官放恣辟震詣見曰當為鷹犬

案此即奏匡以前事謝必有傳故詳序之

賀純

純字仲真會稽山陰人少為諸生博極群藝下辟公府三舉賢良方正五徵博士四公車徵皆不就後徵

後漢書補卷一 謝書 拜議郎數陳災異上便宜數百事多見省納遷江夏

太守

案范書李固傳云陛下卽位聘南陽樊英江夏黃瓊廣漢楊厚會稽賀純則純之名與英瓊比高也

王逸

南郡王逸素與樊英善因與其書多引古譬論勸使

就聘英順逸議談者失望

案范書無逸傳謝此事亦應載樊英傳中英初被詔命僉以爲必不降志及後應對又無奇謀深策英之名高毀甚逸實成之

符融

融見林宗便與之交以紹介于膺以爲海之明珠未

耀其光鳥之鳳凰羽儀未翔膺與林宗相見待以師

友之禮遂揚名天下融致之也

案融字偉明陳留浚儀人爲李元禮高足以郭介李遂有仙舟之美則林宗最知人而偉明又知林宗其識巨矣

融遭黨事禁錮妻亡貧無殯斂潁川張元祖志行士

也來存融弔其妻亡知其如此謂言足下欲尙古道

非不清妙但禮設棺槨制杖衰孔子曰吾從周便推

所乘羸牛車以給殯融受而不辭云

案范稱融妻死鄉人欲爲具棺服融不肯受曰古之亡者棄于中野惟妻子可以行志云云與元祖所勸正合此云貧無殯斂似誤

馮岱

馮岱字德山辟司徒劉寵府與四府掾屬並詣臺集

議邊事

案范書岱為陳留太守附見符融傳中

岱性忼慷有文武異才既到官融往相見薦苑冉為

功曹韓車為主簿孔佃為上計吏

朱果

朱果字仲文

案范書果事見郭泰傳果性輕悍頓林宗訓之遂折節為善仲文范作仲乙扶風人

徐淑

淑字伯進廣陵海西人也寬裕博雅好學樂道隨父

慎在京師贊孟氏易春秋公羊禮記周官善論太公

六韜交接英雄常有壯志舉茂才除渤海修令遷琅

邪都尉

案是時左雄設限年試才之法淑年未及舉本郡充選雄以聞一知幾詰之乃請淑去知一乃徹始徹終之明知十乃因此推彼之學如以數求便成笨伯左雄詰問或乖本旨然澄清選舉未為失也後淑為度遼將軍有名于邊見子璆傳中

劉寬

寬少學歐陽尚書京氏易尤明韓詩外傳星官風隅

算歷皆究極師法稱為通儒未嘗與人爭勢利之事

案寬見東觀記范書絕不載寬之能學僅以為長者而已母乃失文饒耶

寬嘗行有人失牛者乃于路就寬車中認之寬無所

言下駕步歸有頃認者得牛而送還叩頭謝曰慚負

長者寬曰物有相類事容脫誤幸勞見歸何為謝也

案此與卓茂認馬事絕相類由其胸中不見人非不見已足推一牛之細凡名利何處着爭競來

袁忠

袁忠乘船戴笠詣王朗見朗左右僮從皆着青絳綵

衣非其奢麗即辭疾發而退

案忠字正甫為袁閎弟官沛相以清亮稱附見閎傳王朗字景興肅之父也范畧

吳馮

吳馮字子高為州郡吏休假先存恤行喪孝子次瞻

病畢拜覲鄉里耆老先進然後到家名昭遠近

案范書闕此可為今世告假士大夫法

郭賀

郭賀字喬卿為荊州刺史到官有殊政百姓歌曰厥

德仁明郭喬卿忠正朝廷上下平

案賀維陽人范附蔡茂傳後顯宗巡狩賜以三公之服又勅行部去襜帷帝之褒與百姓之歌何相符也又郭躬孫亦名賀范別有傳

男世守校字

後漢書補逸卷之十二

謝承後漢書第二

錢唐姚之駟 魯思 輯

張磐

張磐字子石為廬江太守潯陽令嘗餉一奩甘其子
年七歲就取一枚磐奪付外卒因私以兩枚與兒磐
鞭卒曰何故行賂于吾子

案磐之鞭卒真得謹
小慎微之意范闕

磐以操行清廉見稱守廬江時京師諺曰聞清白張
子石

晉文經

文經名曜遠近聲價已定徵辟不就療病京師不通
賓客公卿將相大夫遣門生旦暮問疾郎吏公府掾
屬雜出其門不得見也

案文經漢中人范附見符融傳文經與梁國黃子
艾純盜虛聲使公卿問疾王臣坐門融察其非真
以語李膺而二子名譽
頓減適足為處士累耳

成瑨

成瑨字幼平弘農人少修仁義篤學以清名見舉孝
廉拜郎中遷南陽太守南陽舊多豪強中官黃門磬
牙境界瑨下車威嚴以檢攝之

案范書瑨無傳
見岑暉傳中

時桓帝美人外親張子禁怙恃榮貴不畏法網瑨與
功曹岑暉捕子禁付宛獄笞殺之桓帝徵瑨詣廷尉
下獄死

案張子禁范作張汜意其名也瑨之誅汜暉實成
之但一時戮其宗族賓客二百餘人未免已甚耳
彼弘農坐嘯之謠黨禍實與
于此公孝其真賢知之過耶

劉瓚

劉瓚字文理平原人也遷太原太守郡有豪強中官
親戚為百姓所患瓚深疾之到官收其魁帥殺之所
藏主人悉坐伏誅桓帝徵詣廷尉以瓚宗室不忍致

後漢書補遺 卷十二

之于刑使自殺
案瓚平原高唐人范載襄楷疏云太原太守劉瓚南陽太守成瑨去除姦邪其所誅翦皆合人望而陛下受闕豎之譖乃遠加考逮則瓚洵忠義之士也直道不容惜矣

范滂

滂汝南細陽人父顯故龍舒侯相

案滂字孟博范云汝南征羌人與此異滂與母訣稱從龍舒君歸黃泉以父常相龍舒也范闕

太守宗資署滂功曹滂外甥西平李頌為鄉曲所棄中常侍唐衡書屬宗資資勅功曹占署文學滂不聽曰頌則滂之姊子豈不樂其仕進但頌滂穢小人不宜玷污清朝不敢以私人

滂不聽宗資署李頌文學資遷怒捶功曹佐朱零零仰曰范滂清裁猶以利刀齒腐朽今日寧受笞死而滂不可違

案孟博不肯以親故使小人濫進其貞亮不必言朱零何人具如此氣節何功曹中多賢者也

劉淑

劉淑字仲承舉賢良方正對策十二科為天下諸儒之表擢為議郎

案淑河間樂成人

起為侍中朝夕建議竭忠于朝補政二百餘事悉有章篇朝廷有勞

案桓帝以淑宗室之賢特加敬異每有疑事常
密諮問而卒為宦官譖死何前聰而後蔽也

延篤

延篤遷京兆尹正身率下憂官如家卹民如子

案篤字叔堅南陽隼人藝文類聚載先賢行狀云
延篤少從唐溪季度受左氏傳篤欲寫無紙乃借
本誦之及辭歸季度曰卿欲寫傳何故辭歸篤曰
已誦之矣季度嘆曰嗟乎延生雖復端木聞一知
二未足為喻也則篤之天姿穎異
又絕尋常文學吏治胥兼之矣

篤徙京尹其政用寬仁憂恤民黎擢用長者與參政
事郡中懽愛三輔咨嗟焉

篤勸民農桑遂增戶口穀食豐饒鄰郡老少歸之

案篤治京尹有聲時人語曰前有趙張三王後
有邊延二君其得民望如此邊名鳳陳留人

篤為侍中自在機密常見進納上殿問政事得失以
經義古典諫帷幄之言不宣外也

案范書作詭
辭密對不明

黃憲

黃憲同郡陳蕃為三公臨朝而嘆曰叔度若在不
先佩印綬矣

案憲字叔度汝南慎陽人憲德同顏子簞瓢可樂
桓靈之世使其若在亦不肯先陳君佩印綬也

徐穉

徐穉字孺子豫章南昌人清妙高時超世絕俗

穉少為諸生學嚴氏春秋京氏易歐陽尚書兼綜風

後漢書補遺 卷十二
角星官筭歷河圖七緯推步變易異行矯時俗間里服其德化有失物者懸以相還道無拾遺四察孝廉五辟宰府三舉茂才

案南州高士窮棲潔清詭時成道隱逸之第一流也然皆從經術來遜世無悶夫豈偶爾范書不載亦淺之乎
窺孺子矣

穉前後為諸公所徵雖不就有死喪負笈赴弔嘗于家預炙雞一隻以一兩綿絮漬酒中暴乾以裹雞徑到所赴冢隊外以水漬綿使有酒氣斗米飯白茅為藉以雞置前酌酒畢留謁即去不見喪主

案孺子隻雞絮酒名士風流通賢佳話范書但載赴黃瓊葬一節而獨遺此何耶

張奐

張奐字然明為使匈奴中郎將率步騎二萬廣宣方畧大破鮮卑匈奴惶懼詣奐乞降聲勢猛烈其秋戰慄不敢犯邊時休屠等反眾大懼奐安坐幃中與弟子講論自若徐乃設奇破之

奐遷安定屬國都尉匈奴羗豪率感奐恩德上馬遺金悉以還之羗性貪而吏清前有八都尉好財貨為所患苦及奐正身潔已威化大行

案奐見東觀記事皆畧同奐為皇甫規所薦文武畧不讓度遼而晚節為中官所詐親勅芝蘭雖有百善不足贖矣

陳朔

陳朔遷揚州刺史貶黜姦慝不畏強禦

案范書闕

周景

周景為豫州刺史辟陳蕃為別駕不就景題別駕輿

曰陳仲舉座也不復更辟蕃惶懼起視職

案景字仲饗廬江舒人范不載辟陳蕃事惟蕃傳云景辟為別駕從事以諫諍不合投傳而去兩賢相契若此豈相厄哉景事附載其父榮傳後

李燮

燮遠遁身于此海劇兄命滕咨家以得免

案燮字德公范云燮父固禍作燮婦文姬豫托父門生王成以存孤成乃將燮乘江東下入徐州界令燮姓名為酒家傭而成賣卜于市陰相往來後與誅詔求固嗣遂出旋拜安平相侃侃有父風據此則載燮避難事與謝大異謝列滕咨姓名定非誤也

楊璇

楊璇字璣平平零陵賊為荊州刺史趙凱橫奏檻車徵之仍奪其筆硯乃啣臂出血以簿中白毛筆染血以書帛上具陳破賊形勢及言為凱所誣以付子弟詰闕自訟詔原之

案璇會稽烏傷人璇之攻賊特製馬車以排囊盛灰順風鼓之又繫布橐于馬尾以火燒布馬驚奔突賊陣蓋祖田單之法也然非先以順風鼓灰使賊人不得張目則戎馬蹂躪我轍先亂矣功大不

賞加以橫誣血書
自明嗚呼懂矣

魏朗

魏朗字仲英出為河南太守以清嚴為治為三河之表

案朗會稽上虞人仲英范作少英事載黨錮傳

朗入為尚書再昇紫微謬禁省不屈豪右為百寮所服以黨事免朗性矜嚴閉門整法長吏希見動有禮序室家相待如賓子孫如事嚴君焉

李膺

李膺出補蜀郡太守修庠序設條教明法令威恩竝

行蜀之珍玩不入于門益州紀其政化朝廷舉能理

劇轉烏桓校尉時鮮卑數犯塞膺常率步騎臨陣交

戰身被瘡痍拭血進戰遂敗寇斬首二千級

案膺字元禮潁川襄城人膺名節矯然如寒霜秋日是黨錮中第一流也然御李登龍高名成黨釀禍既烈流風未已至司馬氏而王謝以旌品自別迨六朝蕭齊間江敬謝淪命移床遠客至有從天子求為士大夫而不得者此皆學元禮而甚者也唐季世士習益尚清流遂成白馬之禍風氣之開有所自矣

膺子珪位至東平相

案珪范作瓚

王威

王威為汝南五官掾太守郭公有罪當徵怖欲自殺
威抱書自投火中而死太守得解其罪

案范書闕

茅容

茅容字季偉陳留人年四十餘耕于野時與等輩避
兩樹下眾皆箕踞相對容獨危坐愈恭郭林宗見而
奇之因請宿寓旦日容殺雞為饌林宗謂為已設既
而以供其母自以草蔬與客同飯林宗起拜之曰卿
賢乎哉因勸令學卒以成德

案范書容事見郭泰傳中觀人于其所忽避
雨而危坐是不忽所忽也故林宗最號知人

抗徐

抗徐字伯徐丹陽人少為郡佐史有膽智策畧三府
表徐有將率之任特遷長沙太守

案范桓帝紀云桂陽胡蘭朱蓋等復反遣中郎將
度尚長沙太守抗徐等擊破斬之又度尚傳載徐
初試守宣城長境內無盜賊後遷太山都尉屢平
寇盜徐亦人傑矣哉抗姓希見風俗通云衛大夫
三抗之後

申屠蟠

陳留申屠蟠耻郡無處士遂閉門養志居蓬萊之室
依桑樹以為棟

案蟠字子龍陳留外黃人九歲喪父哀毀過禮海
內先賢傳曰蟠在家致甘露白雉以孝稱其于逸

後漢書前漢 卷十二 八
民始魯之少連乎豫測黨錮之禍則膺滂遜其識
屢却公車之徵則爽玄讓其高知幾其神乎非徒
遐棲山林韜
伏明姿者也

蟠前後徵辟文書悉掛于樹初不顧盼

詔書令郡以禮發遣蟠到河南萬歲亭折轅而旋

案掛樹折轅二事
甚韻范俱不載

皇甫嵩

皇甫嵩字義真拜車騎將軍討平涼羗口臨鹵廷掃

殄羗口靡有孑遺率整二州獻捷振旅

案嵩安定朝那人度
遼將軍規之兄子

嵩討羗口選將士梟騎萬隊戎車三千公卿百僚祖

送于平樂觀大會

案范載嵩討黃巾賊功蓋天下繼
又平隴右梁州二賊獨遺討羗事

嵩請與州一年田租以贍飢民百姓歌曰天下亂兮

市爲墟母不保子兮妻失夫賴得皇甫兮復安居

案嵩此舉非庸人所能後董卓之亂門下閭忠梁
衍及從子鄴各獻計執卓嵩堅不從而使卓肆虐
亦才有餘而
識不足者耶

巴肅

巴肅爲河南尹正身奉職

案肅字恭祖渤海高城人范載黨錮
傳肅仕至潁川太守以鈞黨死于獄

史弼

史弼年三十為郡功曹承前太守宋訢穢濁之後悉
條諸生聚斂姦吏百餘人皆白太守掃迹還縣高名
由此而興

案弼字公謙陳留考城人弼活鈞黨千
餘人卒以忤侯覽幾死豈天道無知耶

弼遷山陽太守其妻鉅野薛氏女以三五自上轉拜

平原相

案范書不載其蔡邕傳云朝議以州郡相黨人情
此周乃制婚姻之家及兩州人士不得對相監臨
至是復有三互法暹用艱難幽冀二州久缺不補
邕上疏諫之章懷注云三五謂婚姻之家及兩州
人不得交互為官也東
京末年制度可笑如七

第五永

第五永為督軍御史使督幽州蔡邕等天下名才士
人皆會祖餞于平樂館高彪送永在坐因援筆書牘

案永京兆人百官餞永邕等皆賦詩彪獨作箴邕
等甚美之范并載其箴則永乃以彪傳矣平樂館
范作長樂館案皇甫嵩傳稱公卿大會于平樂觀
又張去說張溫亦有祖道平樂觀之語則此觀乃
東京祖餞之地作平樂為是
觀作館亦傳寫之音似也

楊震

震為太常薦明經名士楊仲桓等五人各從家拜博
士

案震見東觀記仲桓名倫陳留人時
選舉多不實震之所薦諸儒稱之

震臨歿謂諸子曰以牛車薄簣載柩還歸

案震飲酖夕陽亭太守移良承樊豐等皆遣吏于
夾縣停留其喪露棺道側是并不得還鄉也悲夫
震卒未葬有大鳥五色高丈餘兩翼長二丈三尺人
莫知其名從天飛下到震棺前舉頭悲鳴淚出霑地
至葬日冲升天上

案震生有冠雀之瑞死有大鳥之
哀豈皆黃衣與環之報耶范曄

楊秉

秉奏侯參故受罪臧累億牂犴男子張攸居為富室
參橫加非罪云造訛言殺攸家八人沒入廬宅又與
同郡諸生李元之官共飲酒醉飽之後戲故相犯誣
言有滔慝之罪應時捶殺以人臣之殺行桀紂之態

傷和逆理痛感天地宜當糺持以謝一州又京兆尹
袁逢于長安客舍中得參重車三百餘乘金銀珍玩
不可稱紀

案秉見東觀記參常侍侯覽之弟時
為益州刺史秉劾之後又劾覽壯矣

秉為豫荆徐兗四州刺史遷任城相自為刺史二千
石計日受俸餘祿不入私門

案范
書同

秉拜侍御史多所彈糾名由此顯京城咸稱有宰相
之才

秉免歸雅素清儉家至貧婁并日而食任城故孝廉

景慮齋錢百餘萬就以餉秉秉閉門拒絕不受

案秉家貧并食峻拒餽遺真不愧清白吏子孫非三不惑者孰能之

楊賜

楊賜字伯欽拜光祿勳位特進又嘉德殿前有青赤氣詔特進遣中使問賜祥異禍福吉凶所在以賜博學碩儒故密諮問宜極陳其意賜上疏陳請案春秋識天投蜺海內亂今妾嬖閹尹共專國朝之所致也

案賜見東觀記伯欽范作伯獻餘同

宗琳

宗琳字伯真橋公表琳明法律徵拜廷尉正

案范書載公薦陳球為廷尉不載琳事

陳球

陳球字伯真為將作大匠桓帝崩營寢陵躬親作事為士卒先百工畢力

案球見東觀記球少涉儒學令繁陽則拒郡守之求賄守零陵則嬰木城而斬賊後廷爭竇太后事豎義甚健不獨監作陵園省費巨萬已也

球祖父屯有令名

案范不載

陳瑀

瑀舉孝廉辟公府洛陽市長後辟太尉府未到永漢

元年就拜議郎遷吳郡太守不之官

案瑀乃球子
范不詳載

陳珪

球兄子珪字漢瑜舉孝廉劇令去官舉茂才齊北相
珪子登字元龍學通今古處身循禮非法不行性兼
文武有雄姿異畧一領廣陵太守

案范書珪乃球弟子為沛相此云兄子
為齊北相未知正誤登事詳見魏志

宗資

宗資字叔都南陽安衆人也家代為漢將相名臣祖
父均自有傳資少在京師學孟氏易歐陽尚書舉孝

廉拜議郎補御史中丞汝南太守署范滂為功曹委
任政事推功于滂任善之名聞于海內也

案資事范載黨錮傳即所稱汝南太守范孟博南
陽宗資三畫諾者也推功任善不免謠謗以至賈
禍名之不可
好也如是

檀敷

敷與子孫同衣而行并日而食

案敷字文有山陽瑕丘人補蒙令
棄官去而貧若此其清不可及也

賈淑

淑為舅宋瑗報讐于縣中為吏所捕繫獄當死郭泰
與語懇惻流涕泰詣縣令應掇陳其報怨蹈義之士

後漢書補卷 卷之二十二 謝書 三

被赦縣不宥之郡上言乃得原
案淑字子厚林宗鄉人先以凶德許其自新卒為善士

桓儼

沛國桓儼字文林罷鄧縣居揚州從事屈豫室中庭有橘樹一株遇其實熟力以竹籬樹四面風吹動兩

實墮地以繩縛繫樹

案儼見東觀記儼作璣范作嚴未知孰是范稱儼仕為郡功曹後徵辟皆不應未嘗為鄧縣也東觀記亦不序其罷縣事謝書應別有據夫桓榮以明經敢大位乃不意學之為利一言出于肺腑其累世見宗豈皆醇儒哉至儼父鸞之緼袍糟食不求贏餘儼之餉給餽遺一無所受足以洒為利一言之差矣

承父嬰

承父嬰為尚書侍郎服事丹墀彌綸舊章策文通訓條在宮禁秘于省閣惟承臺即升複道取得為開覽其餘他官莫敢闕闕也

案范書有承官續漢書載官子名壘無承父嬰世本云承姓衛大夫承叔乘之後抑或承父複姓嬰其名與

楊奇

楊奇字公綽通經才性敏暢入補侍中天子所問引經據義靡不條對

案奇為伯起曾孫范附見傳後其對靈帝云陛下之于桓帝亦猶虞舜比德唐堯其善諍不愧乃視

張馴

張馴字子儁與蔡邕共奏定六經文字擢拜侍中典領秘書馴儒雅敏達有智慧

案馴濟陰定陶人後為大司農蔡邕傳載正定經文者凡七人五官中郎將堂谿典光祿大夫揚賜諫議大夫馬口碑議郎張馴韓說蔡邕太史令單颺

趙咨

東郡趙咨為東海相人遺其雙枯魚噉之二歲不盡以儉化俗

案咨見東觀記范傳咨不載枯魚事遂令羊續獨擅千古

咨在京師病困故吏蕭建絕營之咨豫自買小素棺

使人取乾黃土細擣篩之聚二十石臨卒謂建曰亡後自着所有故巾單衣先置土于棺內尸其中以擁其上

案咨遺書勅子薄葬范全載之其文在前漢楊王孫之上

賈琮

賈琮字孟堅為交趾刺史時州人屯兵反即移書告示使其安資業百姓歌之曰賈父來晚使我先反今見清平吏不敢飯乃以琮為冀州刺史舊典傳車驂駕垂赤帷裳迎于州界及琮之部升車言曰刺史當遠視廣聽糾察美惡何有反垂帷裳以自掩塞乎乃

命御者寒之百城聞風自然悚震

案琮東郡聊城人先為京兆尹以交趾叛故特舉刺交歲間蕩定徵拜議郎餘與謝同

琮在任三年為十三州最

公孫瓚

公孫瓚為郡主簿太守劉君坐事檻車徵官法不聽吏下親近瓚乃改容服詐稱侍卒身執徒養御車到洛陽太守當徙日南瓚具豚酒于北芒上泣辭母墓酌觴祝曰昔為人子今為人臣太守遭事當送日南拜而去既行于道得赦瓚還郡

案瓚字伯珪遼西令支人還郡後舉孝廉除遼東屬國長史以功封都亭侯羌人畏之即所稱白馬

義從者也天下兵起謂可垂掌而得迨後僅保易京而卒見殺于袁紹由其才大而識淺耳

朱儁

朱儁為郡主簿太守尹端被坐討賊許昭失利為州所奏罪應棄市儁乃羸服間行輕齋數百金到京師賂主章吏遂得刑定州奏故端得輸作左校端喜放降免而不知其由儁亦終無所言

案儁字公偉會稽上虞人後以功封錢塘侯蓋在皇甫嵩伯仲之間者

蔡邕

蔡邕字伯喈以侍書御史遷尚書三月之間周歷三臺遷侍中

案邕見東觀記邕之就卓辟乃迫于元凶能族之微旋見敬禮遂懷恩私亦所遭之不幸爾

靈帝建寧五年正月車駕上原陵蔡邕為司徒掾從公行到陵見其儀愾然謂同座者曰聞古不墓祭朝廷有上陵之禮始謂可損今見其儀察其本意乃知孝明至孝惻隱不可易舊或曰本意云何昔在長安時其禮不可盡得聞也光武卽位始葬于此明帝嗣位踰年羣臣朝士感先帝不復聞見此乃率公卿百僚就園陵而翔焉尚書階西祭設神座天子事亡事存之意也以帝聖孝之心親服三年又在園陵初興此儀仰察几筵下顧羣臣悲切之心必不可堪邕見

太傅胡廣曰國家禮有煩而不省者昔不知先帝用心周密之至于此也廣曰然子當載之以示學者邕退而記焉

案今禮有備于古者墓祭是也如生如存雖聖人復起不能廢此明帝之孝遠接舜文范不載此亦關畧矣

邕在王允坐聞董卓死有歎惜之音允責邕曰卓國之大賊殺主殘臣天地所不祐人神所同疾君為王臣世受漢恩國主危難曾不倒戈卓受天誅而更嗟痛乎便使收付廷尉邕謝允曰雖以不忠猶識大義古今安危耳所厭聞口所常玩豈當背國而向卓也

狂瞽之詞謬出患入願黥首為刑以繼漢史公卿惜
邕才咸共諫允允曰昔武帝不殺司馬遷使作謗書
流于後世方今國祚中衰戎馬在郊不可令佞臣執
筆在幼主左右後令吾徒並受謗議遂殺邕

案王子師之誅邕為懼其誣毀何其隘也邕所作
漢紀及十志因亂散亡惜哉范稱邕在允坐殊不
意言之而歎有動于色可謂善于形容較謝信覺
詭妙且載馬碑救邕語甚詳裴松之以此條為
謝承之妄記殆未覽羣史耳

袁閔

閔少修志節矯俗高厲

案閔字夏甫袁安玄孫瘁身修行累徵不應黨事
將作乃築土室潛身十八年其苦節而可貞者與

閔父賀為彭城相往省謁變名姓徒行至府門連日
吏不為通乳母從內出見在門側面貌省瘦為其垂
泣閔厚丁寧此間不知吾慎勿宣露也

案范書簡畧不
如謝書之腴

袁弘

弘嘗入京師太學其從父逢為太尉呼弘與相見遇
是宴會作樂弘伏稱頭痛不聽音聲而退遂不復往
紹術兄弟亦不與通

案弘字邵甫耻其門族貴勢乃變姪名徒步師
門不就徵聘其清風亮節千載尚足矜人范畧

袁祕

祕字永寧黃巾起太守趙謙擊之軍敗封觀與主簿
 陳竭門下督范仲禮賊曹劉偉德主記史丁子嗣記
 室史張仲然議生袁祕等七人擢刀突陣與戰竝死
 案祕乃袁忠之子忠亦閩仲弟也與觀等死子陣
 而太守獲免詔旌祕等門閭號曰七賢蓋成仁取
 義不愧曩訓矣
 范不載七賢名

封觀

封觀字孝起南頓人

案觀雅有志節當舉孝廉以兄名位未顯耻先受
 之伴為瘡疾其友于如此宜其見難不避與袁祕
 等以死衛主也
 范附見袁閔傳

謝弼

謝弼字輔鸞東郡濮陽人

案范書弼字輔宜東
 郡武陽人與此不同

建寧中青蛇見前殿詔公卿以下陳得失弼上封事
 曰蛇者陰氣所生龍之類也龍有鱗甲兵之符也洪
 範傳曰厥極弱時則有龍蛇之孽

案弼奏對切直遂忤奄豎
 舍生立節時事可知矣

蓋勳

勳父字思齊官至安定屬國都尉

案勳字元固敦煌廣至人家世二千石詳見續書
 勳剛直方格面折董卓長揖爭禮雖王允蔡邕猶
 有愧焉

後漢書卷之二十一 卷二十一 三
勲遷潁州太守民吏嘆咏不容于口

案范稱勲為漢陽太守或後遂遷潁也

臧旻

旻有幹才達于從政為漢良吏初從徐州從事辟司徒府除廬奴令冀州舉尤異遷陽州刺史丹陽太守是時邊方有警羗口出寇三府舉能遷旻匈奴中郎將討賊有功徵拜議郎還京師見太尉袁逢逢問其西域諸國土地風俗人物種數旻具答言西域本三十六國後分為五十五稍散至百餘國其國大小道里近遠人數多少風俗燥濕山川草木鳥獸異物名

種不與中國同者悉陳其狀手畫地形逢奇其才歎

息言雖班固作西域傳何以加此

案旻廣陵射陽人范載子洪傳中僅稱其有幹事才而已不具載

旻轉拜長水校尉終太原太守

案旻為從事時上書訟第五訪寃訪竟赦出其以公正發憤不復知常侍之醜也子洪以烈士見殺可云世忠

胡毋班

班王匡之妹夫董卓使班奉詔到河內解釋義兵匡受紹旨收班繫獄欲殺之以徇軍班與匡書云自古以來未有下土諸侯舉兵向京師者劉向傳曰投鼠

忌噐噐猶忌之况卓今處宮闕之內以天子為藩屏
勿至在宮如何可討僕與太傅馬公太僕趙岐少府
陰修俱受詔命關東諸郡雖實嫉卓猶以銜奉王命
不敢玷辱而足下獨拘僕于獄欲以釁鼓此何悖暴
無道之甚者也僕與董卓何親戚義豈同惡足下張
虎狼之口吐長蛇之毒恚卓遷怒何其酷哉死者人
之所難然耻為狂夫所害若亡者有靈當訴足下于
皇天夫婚姻者禍福之機今日著矣曩為一體今為
血讐亡人二女則君之甥身歿之後慎勿令臨僕尸
骸匡得是書抱班二子哭班遂死于獄

案班時為執金吾董卓遣與韓融等譬解袁紹諸
軍紹使王匡殺之范不載此書章懷任及裴松之
魏志注皆錄之章懷畧
而裴詳其中異者數字

高幹

幹字元才才志弘邈文武秀出父躬蜀郡太守祖賜

司隸校尉

案魏志高柔傳稱幹為柔從兄據謝書則賜乃幹
祖而為柔之從叔祖是從父非從兄也陳留耆舊
傳亦同魏志誤矣幹為袁詔甥
始附袁氏後降魏陳留圉人

陰修

南陽陰修為潁川太守以旌賢擢俊為務舉五官掾
張仲方正察功曹鍾繇主簿荀彧主記掾張禮賊曹

採杜佑孝廉荀攸計吏郭圖爲吏以光國朝

案修之所舉皆屬名儒
洵乎國朝之光也范闕

劉表

表受學于同郡王暢暢爲南陽太守行過乎儉表時
年十七進諫曰奢不僭上儉不逼下蓋中庸之道是
故遽伯玉耻獨爲君子府尹若不師孔聖之明訓而
慕夸齊之末操無乃皎然自遺于世暢答曰以約失
之者鮮矣且以矯俗也

案表字景升山陽高平人諫王暢事范載王龔傳
後謝當同之表年十七而立論如此蓋虎子已有
食牛之氣矣

趙昱

昱年十三母嘗病經涉三月昱慘戚消瘠至目不交
睫握粟出卜祈禱出血鄉黨稱其孝就處士東莞某
母君受公羊傳兼該羣業至歷年潛志不窺園圃親
疎希見其面時入定省父母須臾即還高潔廉正抱
禮而立清英儼恪莫干其志旌善以興化殫邪以矯
俗州郡請召常稱病不應國相檀謨陳遵共召不起
或與盛怒終不同意舉孝廉除莒長宣揚五教政爲
國表會黃巾作亂陸梁五郡郡縣發兵以爲先辦徐
州刺史巴祇表功第一當受遷賞昱深以爲耻委官

還家徐州牧陶謙初辟別駕從事辭疾遜道謙重令揚州從事會稽吳範宜旨昱守意不移欲威以刑罰然後乃起舉茂才遷廣陵太守賊笮融從臨淮見討送入郡界昱將兵拒戰敗績見害

案昱字元達琅邪人范稱昱清已疾惡太僕种拂舉爲方正後笮融敗走廣陵昱待以賓禮融利廣陵資貨乘酒酣殺昱放兵大掠非拒戰敗績也范說爲是范書及魏志俱附陶謙傳

公沙穆

穆嘗養猪猪有病使人賣之于市與之言如售當告買者言病賤取其直不可言無病欺人取貴價也賣猪者到市卽售亦不言病其直過價穆怪之問其故

齋半直追以還買猪人告語言猪實病欲賤賣不圖賣猪人相欺乃取貴直買者言賣買私約亦復辭錢不取穆終不受錢而去也

案穆字文義北海膠東人隱居東萊學者自遠而至後爲弘農令百姓稱曰神明范乃載之方術傳抑矣此段文詞拖沓不類謝筆

穆子孚字允慈亦爲善士舉孝廉尚書侍郎召陵令

上谷太守

案穆六子皆知名孚其著也

駱俊

俊字孝遠烏桓人察孝廉補尚書侍郎擢拜陳國相

人有產子厚致米肉達府主意生男女者以賂爲名
袁術使部曲將張闔陽私行到陳之俊所俊往從飲
酒因詐殺俊一郡吏人哀號如喪父母

案范書俊會稽人則烏桓當作烏傷也時陳國王
寵善射黃巾賊起陳得獨完鄰郡人多就之俊傾
資賑贍並得全活後袁術求糧于陳
而俊拒之因遣客詐殺俊亦忍矣哉

伍孚

孚字德瑜汝南吳房人質性剛毅勇壯好義力能兼
人

孚少有大節爲郡門下書佐其本邑長有罪太守使
孚出教勅曹下督郵收之孚不肯受教伏地仰諫曰

君雖不君臣不可不臣明府奈何令孚受教勅外收
本邑長乎乞更受他吏太守奇而聽之後大將軍何
進辟爲東曹屬稍遷侍中河南尹越騎校尉董卓作
亂百僚震慄孚着小鎧于朝服裏挾佩刀見卓欲伺
便刺殺之語闕辭去卓送至閣中孚因出刀刺之卓
多力退卻不中卽收孚卓曰卿欲反耶孚大言曰汝
非吾君吾非汝臣何反之有汝亂國篡主罪盈惡大
今是吾死日故來誅姦賊耳恨不車裂汝于市朝以
謝天下遂殺孚

案裴松之魏志注云謝承記孚字及本郡則與瓊
同而致死事乃與孚異不知孚爲瓊之別名抑別

後漢書前送 卷一十二 三
有伍孚也蓋未詳之駟案范書孚事見董卓傳與此畧同但官越騎校尉非侍中耳伍瓊則為侍中當卓欲徙都長安時瓊與周此同諫遂受害是瓊未死時卓惡未至貫盈何遽挾刀欲殺之自殺瓊後卓遷都如陵罪惡山積王允士孫瑞等謀誅卓而孚亦于閣中行刺則孚與瓊自是兩人特同郡耳其同字或誤也

鄭玄

玄所注周易尚書毛詩儀禮禮記論語尚書大傳中候乾象曆又著天文七政論魯禮禘祫義六藝論毛詩譜駁許慎五經異義答臨孝存周禮難凡百餘萬

言

案范書載玄所著與此同惟論語下有孝經一書謝脫誤耳自前漢經術聿興諸家竝起至康成而

集其成遂令孔書大義有所歸宿辰巳之夢即宣尼亦以為身後一人也

陸康

康字季寧少惇孝悌勤脩操行太守李肅察孝廉肅後坐事伏法康斂尸送喪還潁川行服禮終舉茂才歷三郡太守所在稱治後拜廬江太守

案范書闕吳志陸績傳載績父康漢末為廬江太守即此吳郡吳人

禰衡

禰衡與黃祖子射尤善衡與俱讀蔡邕所作碑文射愛其文恨不寫取衡謂射曰吾雖一遇猶識其言其缺兩字不明因書出之射寫還比校皆無所誤惟兩

字缺

案衡字正平原般人衡才思雲上而狂生故態令人側目鸚鵡一賦善自况矣

趙謙

趙謙字彥信太尉戒之孫蜀郡成都人

案范獻帝紀初平元年二月董卓以光祿勳趙謙為太尉三年誅董卓李郭反復以前將軍趙謙為司徒乃紀中又載卓所愛奴放縱為司隸校尉趙謙所殺卓大怒召隸都官搃殺之豈別有趙謙耶

徐循

徐循少遭父母喪致哀毀瘁歐血發病服闋隱居林藪躬耕稼穡勸則誦經貧窶困乏執志彌固不受惠于人

案循字季登孺子之子隱居不仕漢末寇賊縱橫皆約教不犯其間南州兩世高風動人如此非尋常隱士也

董襲

董襲志節慷慨武毅英烈

案吳志稱襲字元代會稽餘姚人有傳范關

劉翊

頽陽劉翊好賑貧乏陳國張季札弔國喪值冰寒車毀牛病不能進翊逢之推所乘車牛強與之

案翊字子相頽川陰人翊能周施而不有其惠尤人所難後為陳留太守時值喪亂士大夫流離死亡皆為救其困乏寧俱餓死其仁人耶季札范作季禮未知就是

佛

佛以癸丑七月十五日托生于淨住國摩耶夫人腹
中至周莊王十年甲寅四月八日生

案此全錄梵書本行
經中語范刪為是

三君

三君者一時之所貴也竇武劉淑陳蕃少有高操海
內尊而稱之故得因以為目

案此亦見范
黨錮傳序中

交趾

交趾七郡貢獻皆從漲海出入

案此與范同今交趾國入貢從與
西思明府陸路而來與古異矣

弩

高帝在平城為口所困一人俱角弩一張為備

案此必對事中
所述也范闕

涉皇山

餘暨有涉皇山

案劉昭補志餘暨屬
會稽郡無涉皇山名

五經碑

靈帝詔諸儒正定五經刊于石碑為古文篆隸三體
立太學門外瓦屋覆之四面欄障開門于南河南郡

設吏卒視之

案時蔡邕與諸儒正定後邕乃書丹刻石范書見儒林傳序但云樹學門不細登也今陝中西安府學有九經及論語孝經爾雅碑共一百五十九卷字樣四卷間有搨本行世案唐文宗時鄭覃以經籍刊繆建石譬刊準漢故事太和七年敕唐言度復定石經字體在國子監立石于開成二年告成今觀搨本皆正書且多做歐虞法禮記首月令以尊明皇諱純字以尊憲宗其為開成所刻無疑相傳宋元祐中始置今學明世宗時因地震倒損有王生別刻小石補之夫唐書謂文宗朝石經遺棄師法不足觀亦以其變分隸為正書耳漢碑不可復得則唐石經亦足寶貴矣

蝗

永平十五年蝗起太山彌行兗豫

案范書關

寧陽主簿

寧陽主簿訴其縣令七歲不省主簿乃上書曰臣謂陛下為臣父章百上終不見省豈可北詣單于以告怨乎帝乃大怒

案范書寧陽主簿事見虞詡傳中佚其名主簿銜許取戾賴詡力救答之而已寧陽屬東平國故城在今兗州

周平王後

燕字少卿其先出自周平王之後漢興紹嗣封為正公食采于汝濱也

案范書燕汝南安城人宣帝時為郡決曹掾代太守罪當下蠶室乃嘆曰我平王之後正公孫豈

後漢書補逸

卷二十二 謝書

天

後漢書卷之十一
可以刀鋸之餘不見先君遂不食而死云孫嘉字
惠文從太守討賊以身扞之可謂繩武者矣傳嘉
序其先故
附見云

諫議大夫

傳翻字君成轉諫議大夫天性諒直數讜言武帝嘉
之

案范書不載前漢承秦舊為諫大夫至後漢乃增為諫議大夫此是追序則誤矣

三男共娶

范延壽宣帝時為廷尉時燕趙之間有三男共娶一
妻生四子長各求離別爭財分子至聞于縣縣不能
決斷讞之于廷尉于是延壽決之以為悖逆人倫比

之禽獸生子屬其母以子竝付母尸三男子市奏免
郡太守令長等無師化之道天子遂可其言

案此必封事中引叙及之范書闕風化固重乃置之棄市且罪男贊女于義何居比堂書鈔亦載謝書此條文有小異

腹背毛

非腹背之毛羽翼之佐者也

案書鈔引此二語在宰相條內莫知誰指刪節過當遂爾闕疑

男世守校字



國

